



COLEGIO ARUBANO

R.K SCHOOL VOOR CICLO BASICO,
CICLO AVANSA, V.W.O EN H.A.V.O.
VONDELLAAN 14
TEL. 5822005 / 5822684 / 5831373 / 5828930
FAX: 5832676, ARUBA
E-mail: info@colegioarubano.aw

Na e alumnonan di Colegio Arubano y nan
mayornan/ cuidadonan

Oranjestad, 22 di september 2020

COLAUA: 2020/2021-029

Topico: procedura di ausencia y les di gym.

Apreciabel mayor/cuidado y apreciable alumno,

Siman pasa Aruba a haya un susto cu un gran cantidad di caso di contagio nobo. Afortunadamente, Colegio Arubano a conta cu masha poco caso di contagio. Sinembargo, hopi alumno mester a bay den cuarentena obligatorio door cu nan tin famia cu a test positivo pa Covid-19. Nos ta desea tur esnan concerni, un pronto recuperacion.

Cuarentena

Den e protocol *Richtlijn voor quarantaine in opvang- en onderwijsinstellingen* tin e procedura di cuarentena describi. Importante ta cu e cuarentena ta dura 14 dia. Colegio Arubano ta mantene su mes estrictamente na e protocol aki. Esaki ta nifica cu, en todo caso, ta raporta na jeugdgezondheidszorg di DVG si tin caso di contagio cu Covid-19. Den deliberacion cu e instancia aki ta dicidi kico lo bira e siguiente pasonan. Un caso positivo den un klas no ta nifica cu automaticamente henter e klas ta bay den cuarentena. Esaki ta sosode solamente si esun contagia tabata tin contacto estrecho cu otro persona pa mas cu 15 minuut, sin proteccion. Contacto estrecho ta nifica un distancia di menos cu 1.5 meter sin tapaboca.

Docente ausente

No solamente e alumnonan tin biaha mester bay den cuarentena, sino tambe e docentenan. Tin caso den cua e docente mester bay den cuarentena pa motibo cu tin caso positivo den seno familiar. E docentenan aki ta duna les mas tanto posibel for di cas. Siman pasa tabata tin un docente cu a test positivo pa Covid-19. No tin motibo pa panico, pasobra e docente concerni ya tabata e siman anterior den cuarentena pa motibo cu tabata tin caso positivo den seno familiar. Den e periodo ey e no tabata tin sintoma tampoco.

Lastimamente no ta tur docente cu ta ausente ta den cuarentena. Tin docente cu ta malo, pero no cu Covid-19! Nan no ta duna les. Colegio Arubano lo informa tur esnan concerni di biaha ora tin caso positivo.

Medwork

E procedura na Medwork ta adapta. Siman pasa a sali un comunicado tocante esaki. Ademas, e tabata contene adres robes. E procedura adapta cu e adresnan corecto bo ta haya adhunto e carta aki.

Ausencia durante prueba(toets)

Entretanto, scol ta habri ya caba pa algun siman. Esaki ta nifica cu ya tin e prome pruebanan pa e aña escolar. E reglanan usual relaciona cu ausencia durante prueba ta conta. Sinembargo, tin excepcion pa e alumnonan cu ta cay den grupo di risico, esnan cu tin Covid-19 of cu ta den cuarentena obligatorio.

Algun prueba, manera presentacion, por haci via cas mes. Pa e otro pruebanan cu no por haci asina, e siguiente reglanan ta na vigor:

- Un alumno cu ta malo ta raporta na scol via e link riba nos webiste of telefonicamente y ta raporta na Medwork.
- E alumnonan cu ta den cuarentena lo haya oportunidad pa traha e prueba unabes nan ta na scol bek. Nan mester di un comprobante cu nan tabata den cuarentena. Esaki por ta un resultado positivo di un familiar(bou mesun dak), un declaracion di DVG of e declaracion di Medwork.
- E alumnonan cu ta cay den e grupo di risico y cu rectorado ta na altura di nan, ta haci palabracion individual.
- Den caso di e alumnonan cu ta malo pa tempo largo, lo evalua pa caso con ta soluciona e situacion.
- E alumnonan cu ta ausente, pero cu no ta cay den ningun di e categorianan ya menciona, no ta haya oportunidad pa traha e prueba(haal in).

Grupo di risico

No pa tur hende ta cla ta ken ta pertenece na e grupo di risico. Segun e protocolnan di DVG, e siguiente personanan ta pertenece na e grupo di risico:

- Adulto mayor di 70 aña
- Adulto riba 18 aña cu e siguiente condicionnan di salud
 - Bou tratamiento medico di specialista di pulmon, debi na gravedad di su malesa cronico no regula y desfuncion di su pulmon y vianan respiratorio.
 - Tin un malesa cronico di curazon cu debi na gravedad ta bou tratamiento medico di cardioloog.
 - -Diabetes mal regula , no regula of diabetes cu complicacionan secundario.
 - Problema di rion grave cu ta dialisando of ta wardando pa transplante di rion.
- Un sistema inmunologico abou debi na
 - medicamento pa malesa auto-imune
 - despues du un transplante di organo of stamcell,
 - un malesa hematologico , asplenia of otro malesanan cu ta afecta e sistema inmunologico cu ta rekeri tratamiento medico debi na e gravedad di e malesa manera HIV no trata of HIVcu valor du CD-4<200 mm³
 - serca pashent di cancer cu ta hayando of den e ultimo 3 lunanan di chemotherapie y/of bestraling.
 - Malesa grave di higra (Child-Pugh classificatie B of C)
 - Obesidad (sobrepeso extreme) cu un BMI di 40 of mas

Si un alumno ta pertenece na e grupo di risico, e mayor of e alumno por raporta esaki na rectorado. Solamente e casonan ya menciona ta pertenece na e grupo di risico. E alumnonan cu nan mes no ta pertenece na e grupo di risico, pero si ta biba cu persona, cu ta pertenece na e grupo di risico, nos ta spera nan na scol durante prueba.

Les di gym

Desde mañan, diaranson, 23 di september, e lesnan di gym lo tuma lugar atrobe den gymzaal. No lo tin deporte den grupo, ni deporte di contacto. Banda di esaki, lo percura pa tur mucha tin suficiente espacio pa nan move, unda e distancia lo keda mas cu 1.5 meter.

No mag di baña despues di les di gym. Cada alumno mester trece un serbete pa nan seca nan mes y un t-shirt di Colegio limpi pa nan cambia despues di les.

Cada alumno ta trece nan mesun boter di awa. No mag parti cu otro.

Tur esaki ta describi den e protocol cu e seccion di *Lichamelijke Opvoeding* a traha hunto cu IBisa. Aunke no ta tur cos ta posibel, tog por ofrece algun forma di enseñansa di movecion, cu ta importante pa nos alumnonan.

Poco poco tur hende ta cuminsa custuma na e situacion nobo na scol. Tog esaki ta keda un temporada interesante. Loke a dicidi awe, por cambia mañan den algo completamente otro. Scol ta tuma tur precaucion necesario pa minimalisa e peliger di contagio. Banda di esaki, e responsabilidad di un y tur ta pa keda 1.5 m di distancia di otro, uza tapaboca, laba man constantemente y keda cas si tin sintoma. Solamente di e manera aki nos por combati e virus.

Mi ta desea tur alumno hopi exito cu nan pruebanan y spera riba bon resultado.

Saludo cordial,
den nomber di rectorado.



T.R. Croes M Ed
Rector